

Internasjonal vidaregåande skule

Tilbod om eit skuleår i utlandet

**Elevar som tek Vg1 på Studiespesialiserande utdanningsprogram
i år, kan ta Vg2 i Skottland neste år.**



Møre og Romsdal
fylkeskommune



HARAM
VIDAREGÅANDE
SKULE

Internasjonal vidaregåande skule

1. Innleiing

Internasjonal vidaregåande skule er eitt av undervisningstilboda til Møre og Romsdal fylkeskommune. Søkjarane må vere elevar i Vg1 på utdanningsprogram for Studiespesialisering eller Studiespesialisering internasjonal, og velje enten språk/samfunnsfag/økonomi eller realfag. Tilbodet blir administrert av Haram vidaregåande skule, og er godkjent av HK-Dir og Statens Lånekasse for utdanning.

Ordninga går ut på at ei gruppe elevar frå Møre og Romsdal fylke går på ein av samarbeidsskulane våre i Edinburgh, Skottland i eit heilt skuleår.

Skuleåret tel som Vg2 i utdanningsprogram for Studiespesialisering. Etter året i utlandet kjem elevane tilbake til norsk vidaregåande skule, og går inn i Vg3.

Elevar som nyttar seg av denne ordninga, kan såleis gjennomføre den vidaregåande utdanninga si på dei vanlege tre åra - samstundes som dei skaffar seg verdifull internasjonal studieerfaring.

Studietilbodet i Skottland er eit eineståande tilbod for elevar frå Noreg, men det er krevjande, og stiller store krav både til elevane sine evner til omstilling og til sjølvstendig, og målmedvite arbeid.

2. Samarbeidsskulane i Skottland

Elevane frå Noreg får gå på ein av dei to samarbeidsskulane våre i Edinburgh. Dei to skulane, Clifton Hall School og ESMS (Erskine Steward's Melville School), er begge private skular. Skulane har eigne kontaktlærarar som følgjer opp dei norske elevane. Kva skule elevane får plass på, vert i hovudsak avgjort ut frå fagval og kvar vertsfamilien til eleven bur.

Eit viktig mål for skuleåret er å vere i eit miljø som fremjar læring av engelsk. All undervisning foregår sjølvstendig på engelsk, og ein elev kan vere den einaste norske eleven i eit fag.

Heimesida til Clifton Hall School: www.cliftonhall.uk

Heimesida til ESMS School: www.esms.org.uk

3. Fagvalet til elevane

Samarbeidsskulane våre tilbyr fag som elevane kan byggje vidare på i Vg3 når dei kjem tilbake til Noreg. Dei vil få hjelp til å velje tre programfag, framandspråk og matematikk, slik at dei oppfyller krava innanfor programområdet sitt i Studiespesialiserande utdanningsprogram. Når det gjeld nokre av fellesfaga, blir elevar som tek eitt år av den vidaregåande opplæringa i utlandet, fritekne for desse etter visse reglar. I både norsk og historie vil elevane få konsentrert undervisning, organisert i nokre samlingar medan dei går på skule i Skottland. Desse faga har eksamen etter Vg3, og elevane må vere budde på ein god del sjølvstudium. Elevane er og garantert undervisning i sitt andre framandspråk (4 veketimar).

4. Vertsfamiliar

Samarbeidsskulane våre skaffar vertsfamiliar for elevane frå Noreg. Elevane bur i private heimar som betalande gjestar, dvs. at dei betalar ein pris som dekkjer husrom, mat (frukost og middag), lys, oppvarming og ei rimeleg mengd klesvask.

Pris for hus og mat: 130 pund pr. veke.

Elevane får bortebruarstipend frå Statens Lånekasse.

5. Norsk kursleiar

Studietilbodet i Skottland har ein norsk kursleiar som har ansvaret for

- kontakt med skulane i Skottland
- avvikling av samlingane (sjå punkt 6)
- oppfølging av elevane
- administrasjon

Kursleiar kjem til Skottland fleire gonger i løpet av skuleåret. Elles står kontaktlærarane i Skottland til disposisjon for dei norske elevane dersom dei treng hjelp. Kursleiar held dessutan kontinuerleg kontakt med elevane pr. e-post og telefon. Skulle det vere særleg trong for det, vil kursleiaren kunne reise til Skottland på kort varsel.

6. Samlingar

Det vert skipa til ulike samlingar for elevane som vert tekne ut til studietilbodet i Skottland.

- Eit møte for elevane og deira føresette i mai/juni, kort tid etter at elevane er valde ut. På dette møtet blir det gjennomgang av alle dei praktiske sidene ved opplegget.
- Ei oppstartsamling i starten på skuleåret i Skottland. Denne har som føremål å bli kjent, og inneheld ulike praktiske aktivitetar. Elevane må rekne med ei utgift på kr 1.500 for denne samlinga.
- Eigne samlingar med hovudvekt på undervisning i norsk og historie for Vg2, samt samtale med kontaktlærar. Desse samlingane vert gjennomførte i Skottland.

7. Reisa til Skottland

Omkring 20. august reiser elevar og kursleiar saman til Skottland. Reisa går med fly til Edinburgh. Haram vidaregåande skule ordnar det praktiske med denne reisa og med heimreisa til jul, men elevane må sjølve betale billettane. Til reiser elles i skuleåret, må elevane ordne med billettar sjølve. Alle elevane får eit reisestipend frå Statens lånekasse.

8. Skuleåret i Skottland

Skuleåret i Skottland fell i tre terminar. Start- og sluttdatoane er om lag slik:

Termin 1:	20. august - 20. desember
Termin 2:	06. januar - 03. april
Termin 3:	20. april - medio juni

Mellom terminane er det ferie (omlag 2 veker ved jul/nyttår og påske).
Alle reiser heim til jul og påske.

Elevane har også andre fridagar i løpet av skuleåret.

I Skottland vil elevane vere med på ulike arrangement/turar. Elevane må rekne med ein eigenandel for desse turane, som delbetaling for overnatting, mat og reiseutgifter.

9. Økonomi

Utdanningstilbudet er finansiert av Møre og Romsdal fylkeskommune, og gir rett til støtte frå Statens Lånekasse. Eigenandelen til skulepengane (15 %) er dekt av fylket, og resten av skulepengane (85 %) får elevane dekt gjennom søknad til Lånekassen.

Den einskilde eleven må sjølv dekkje bu-utgiftene på 130 pund pr. veke, men her dekkjer bortebruarstipendet det meste.

Det kan kome utgifter til samlingar og reiser, og nokre mindre utgifter til t.d. kopiering og skuleuniform som elevane må betale sjølve.

10. Statens Lånekasse

Elevane ved studietilbodet i Skottland søker om bortebruarstipend, reisestipend og utstyrsstipend, samt dekning av 85 % av skulepengane. I tillegg yter Lånekassa lån etter behovsprøving.

11. Helsetenester for elevane i Skottland

Alle bør ha såkalla Europeisk helsetrygdekort. Det sikrar at ein får helsetenester i utlandet på lik linje med dei som bur fast i landet. Kortet er gratis, og kan bestillast på www.nav.no.

12. Møre og Romsdal fylke sitt ansvar for elevane - Forsikring

Møre og Romsdal fylkeskommune teiknar eigen reise-/heilårsforsikring for elevar ved studietilbodet i Skottland. Fylket dekkjer også utgiftene til visum.

13. Søknad

Elevar som søker plass på dette studietilbodet skal søkje på vanleg måte gjennom fellesinntaket i VIGO. Søknadsfristen er 1. mars. Møre og Romsdal fylke har egne kodar for dette tilbodet.

I tillegg skal elevane fylle ut eit eige søknadsskjema og motivasjonsbrev, som skal sendast til Haram vidaregåande skule.

Inntaket vert gjort av Inntakskontoret i samarbeid med Haram vidaregåande skule. I samband med inntaket vil aktuelle elevar bli kalla inn til eit intervju som går føre seg på engelsk.

14. Vitnemål

Etter skuleåret i Skottland vil kvar elev få dokumentasjon frå sin skule i Skottland. Dei vil dessutan få ei stadfesting av skulegangen i utlandet frå Haram vidaregåande skule. Etter fullført og bestått Vg3 vil elevane få vitnemål for vidaregåande opplæring i samsvar med dei reglane som gjeld for godkjenning av eit skuleår i utlandet.

15. Administrasjon

Tilbodet vert administrert av Haram vidaregåande skule.

Meir informasjon om dette opplæringstilbodet får du ved å kontakte:

Haram vidaregåande skule

Skuleråsa 10

6270 BRATTVÅG

Telefon 71 28 17 00

E-post www.haram.vgs@mrfylke.no

www.haram.vgs.no

Vg2 ST i Skottland



Princes Street, Edinburgh



Tattoo, Edinburgh



Edinburgh



Aktivitet oppstartsveka



Aktivitet oppstartsveka



Weekendtur i Nord-Skottland



Velfortent pause i kantina



The Norwegian Class at Armadale



Øving for eit av skulebanda



Gode anlegg, eigen idrettshall



Skulen har egne fotballbaner



Skulen har eigen svømmehall



Proms



Eit Vg2 år i Skottland?



17. mai feiring i Edinburgh